



Centrale Bank van Curaçao en Sint Maarten

Fact sheet

Willemstad, 2020

Reserva di Oro di Banko Sentral

Atraves di historia, oro a fungi komo medio di pago debí na su karakterístikanan natural i komo ku el a ser aseptá ampliamente komo un medio pa almasená balor. Ta p'esei, tradishonalmente, oro a bin ta forma parti di reserva ofisial di hopi pais, inkluso di e union monetario di Kòrsou i Sint Maarten. Antes, reserva ofisial di hopi pais tabata konsistí kasi kompletamente di oro so.

Orígen

E práktika ku bankonan sentral tin di mantené reserva di oro tin su orígen den e sistema Bretton Woods, un sistema di tasa di kambio fiho mará na balor di oro (standart di oro). Oro tabata hunga un papel sentral den e sistema monetario ku tabata na vigor den e periodo despues di Segundo Guera Mundial. E estadonan miembro di Fondo Monetario Internashonal (IMF), ku a keda establecí e tempu ei, a akordá ku nan lo mara balor di nan monedanan nashonal na dòler estadounidense i ku Estádos Unídos na su turno lo mara balor di dòler na balor di oro. Ora presidente di Estádos Unídos Richard Nixon a para unilateralmente e posibilidat di kambia dòler pa oro na kuminsamentu di añanan 70, e sistema Bretton Woods a yega na su fin i ekonomia mundial a pasa pa un sistema di tasa di kambio variabel, loke ta reflehá e balor di kada moneda mihó.

Historia di nos reserva di oro

Na 1961, Bank van de Nederlandse Antillen (BNA) a heredá su reserva di oro via e traspaso di aktivo i pasivo di su predesesor, Curaçaosche Bank, fundá na 1828. Komo ku e tempu ei e standart di oro tabata na vigor ainda, Curaçaosche Bank mester a disponé di sufisiente reserva di oro pa por a kubri su pasivonan. Sinembargo, ora Aruba a sali for di Antia Hulandes na 1986, a pone e oro di BNA den un fondo, ku intenshon di likid'é despues. A sea bende e monedanan di oro òf dirti nan i repartí nan komo bara di oro entre banko sentral di Antia Hulandes i esun di Aruba. Ku desmantelashon di Antia Hulandes, BNA i su reserva di oro a pasa pa Centrale Bank van Curaçao en Sint Maarten (CBCS), ku ta e banko sentral di e union monetario di Kòrsou i Sint Maarten.

Meta di nos reserva di oro

CBCS ta enkargá ku atministrashon di reserva ofisial di nos union monetario. E reserva akí ta konsistí di oro i divisa. Dia 31 di desèmber 2019, reserva ofisial tabatin un balor di NAf 3,4 miar. NAf 1,1 miar di e suma akí tabata konsistí di oro (33%) i NAf 2,3 miar, di divisa (67%). Ta tene e divisanan komo depósito di disponibilitat inmediato, entre otro na Federal Reserve di Estádos Unídos, komo título di debe di diferente gobièrnu, instituto ku garantia di gobièrnu i institushon



Centrale Bank van Curaçao en Sint Maarten

supranashonal, i komo depósito na plaso fiho na banko internashonal grandi. E divisanan di reserva ofisial ta sirbi pa apsorbé fluktuashon den entrada i gastu ku ta resultado di e transakshonnan ku e habitantenan di Kòrsou i Sint Maarten ta hasi ku sobrá pais na mundu. Pa por garantisá ku lo no tin interupshon den e fluho di transakshon internashonal, CBCS ta aspirá pa e reserva di divisa keda na un nivel ku ta sufisiente pa por kubri tres luna di importashon.

E reserva di oro ta kumpli ku e funshon importante di apsorbé un posibel kaida rápido di e reserva di divisa komo konsekuensia di un shòk severo òf di durashon largu. Esei ta duna e gobièrnunan di Kòrsou i di Sint Maarten mas espasio pa tuma medida korektivo. Di e manera ei, oro ta brinda mas konfiansa den mantenshon di e tipo di kambio fiho di florin di Antia Hulandes ku dòler estadounidense.

Resúmen

Debí ku CBCS ta apliká un sistema di tipo di kambio fiho, un nivel adekuá di reserva ta importante pa por tin un ekonomia stabil. Un parti supstansial di e reserva ta konsistí di oro, i esei ta yuda apsorbé fluktuashon di tasa di kambio. Por konsiderá e rendimentu abou di oro komo e preis ku bo ta paga pa e siguridat ku e ta brinda: mientras ku preis di otro tipo di aktivo ta kai ora ekonomia bai atras, preis di oro ta subi hustamente.

Pues, en prinsipio, tin tres diferente rason pa mantené reserva di oro: siguridat, likides i diversifikashon. Debí na su karakterístikanan intrínstiko, oro ta brinda siguridat. Oro ta un aktivo líkido, sigur ora tin fluktuashon drástiko di tasa di kambio. Ademas, oro ta diversifiká reserva di un banko sentral i asina, riba plaso largu, ta sirbi komo kobertura kontra dòler i otro moneda importante.

E paisnan den nos region ku ta apliká un sistema paresido di tasa di kambio fiho pero ku no tin reserva di oro ta kore un riesgo finansiero muchu mas grandi ku nos. Pues, Banko Sentral su reserva di oro ta un komponente krusial di su strategia pa maneho di riesgo. No ta pòrnada te dia djawe oro ta sigui hunga un papel asina importante den reserva di e bankonan sentral rònt mundu.